



Yebo le batswadi ba hae ba ne ba dula morung.

Hona sebakeng seo, ho ne ho dula ledimo le bitswang Zim-zim.

Zim-zim o ne a tsejwa ka ho ja bana.



Ntate wa Yebo Sikwebu, e ne e le setsomi. Kamehla ha a kgutla hae o ne a hoeletsa a re, "Yebo! Yebo! Tloho o nkgahlanyetse mora ka."

Yebo o ne a ye a re ho mmae, "Ntate o a mpitsa, ke tshwanetse ho mo kgahlanyetsa."

Zim-zim a elelletswe hona.



Zim-zim a leka ho etsisa Sikwebu, “Yebo! Yebo! Tloho o nkgahlenyetse mora ka.”

O ne a tseba hore ha a bue jwaloka Sikwebu.

“Nka kgona jwang ho fetola lentswe la ka?” a ipotsa.



Zim-zim a ya batla thuso ho moloi.

“Nka kgona jwang ho fetola lentswe la ka hore le tshwane le la batho?” ho botsa ledimo.


“Tjhesa selepe ho fihlela se e ba sekgubedu e be o se kwenya se felletse,” ke moloi a mo eletsa.



Zim-zim a ya hae a kwenya selepe se tjhesang.

Yaba o a hoeletsa, Yebo, "Yebo! Yebo! Tloho o nkgahlanyetse mora ka."

Tjhe! Lentswe la hae le ne le sa tshwane le la Sikwebu, le ne le tebile haholo.



Zim-zim a kgutlela ho moloi a sa thaba.

“Ke lokela ho etsang hore lentswe la ka le be lesesane jwaloka la batho?” a botsa.

“Kgetlong lena, tjhesa selepe bosiu bohle ebe hoseng o a se kwenya,” ho araba moloi.



Kamora ho phethisa ditaelo, Zim-zim a ya hoeletsa, "Yebo! Yebo! Tloho o nkgahlanyetse mora ka."

Lentswe la hae le ne le tshwana hantle le la Sikwebu. Yebo a phakisa a ya kantle.

Empa e ne e se ntatae.



Yebo a elellwa phoso ya hae ho se ho le lata.

A leka ho baleha ka tlung empa Zim-zim a mo tshwara ha bonojwana feela.

O ne a jere Yebo jwaloka ka kutu mme a ya le yena harehare morung.




E se kgale, Sikwebu a fihla hae a hoeletsa,

“Yebo! Yebo! Tloho o nkgahlanyetse mora ka.”

Yebo a se ke a hlaha. Mme wa Yebo a araba, “O se o mmitsitse.”

Ba hlokomela hore ngwana bona o nkuwe ke Zim-zim.



Sikwebu a nka molamu wa hae wa ho tsoma a ya morung
ho ya batla mora hae.

A sa le hole, a bona Zim-zim a robetse lebopong la noka. Ho
ne ho e na le mokotlahadi pela hae.



Sikwebu a nanarela Zim-zim. Ha a se a le haufi, a mo otlala ka molamu.

Zim-zim a tshoha, a tlola a ferekane a baleha.

Sikwebu a tlamolla mokotla a ntsha mora hae.



Sikwebu a haka mora wa hae, a thabetse ho kopana le yena hape. Yebo le yena o ne a thabetse ho bona ntatae.

Ba lebala ka Zim-zim ba kgutlela hae.